



**PARTANGIANGAN HAMAULIATON  
POMPARAN Op. AMBE PASARIBU  
GKPI Jemaat Dame Dr. IL. Nommensen  
Senin, 5 April 2021**

---

**1. Joujou Marsaor Dohot Debata** *(U=Uluan; R=Ruas)*

**L :** Hamuna angka dongan na hinaholongan, sadarion marpungu do hita di inganan on laho martangiang, mamuji huhut pasangap goar ni Debata ala pangaramotionNa di hita saluhutna pomparan Op. Ambe Pasaribu, boru, bere, dohot ibebere na adong di luat on. Antong, hita angka na pinarhamaol ni Debata, beta ma hita mandok di tangiangta : Mauliate ma di Jahowa, ai pardenggan basa do Ibana, ai ro di saleleng ni lelengna do asi ni rohaNa.

**R :** Ale Debatanami, mandok mauliate ma hami tu Ho dohot mamuji goarMu na marmulia i.

**L :** Sai arahon donganmu martangiang, dok hamu ma : Mandok mauliate ma hamu tu Tuhan ni angka tuan, ai ro di salelenglelengna do asi ni rohaNa. Mandok mauliate ma hamu tu Debata ni angka surgo, ai ro di saleleng ni lelengna do asi ni rohaNa.

**R :** Ale Debatanami, mangasahon goarMu hami mamuji manipat ari, jala mandok mauliate hami di asi ni rohaM salelenglelengna.

**U** Antong hamu na hinaholongan, beta ma hita sumombahon pujipujian tu Debata, ima tangiang tanda ni mauliate ni rohanta tu Ibana.

**2. Marende BE no 18:1-2 “Ungkap Bahal na Umuli”**

1. Ungkap bahal na umuli bagas ni Debatangki;  
Ai tusi do au naeng muli, ganup jumpang Minggu i.  
Hulului do disi bohi ni Debatangki.

2. Nunga ro au, o Tuhanku, ro ma Ho tu au muse,  
Ai di bagas ingananMu las ni roha do sude;

Sai bongoti rohangkon baen ma joromi dison.

### 3. **Votum – Introitus – Tangiang**

**U** : Marhitehite goar ni Debata Ama dohot Goar ni Anak-Na Tuhan Jesus Kristus, dohot Goar ni Tondi Parbadia natumompa langit dohot tano on. Amen. Ho do ale Jahowa dihalungunhon rohangku, ale Debatangku marhaposan tu Ho do ahu, unang tung paila ahu, asa unang marsuraksurak musungku marnida ahu.

**R** : Ndang tahe tagamon tarurak sude angka namanghaposi Ho, sai maila do sogot angka pangose so ada alana.

**U** : Ale Jahowa sai pabotohon ma tu ahu angka dalanMu, jala ajarhon tu ahu angka bogasMu.

**R** : Sai togutogu ma ahu tu bagasan hasintonganMu jala ajari ahu, ai Ho do Debata ni hatuaonhu, Ho do nahuhaposi ganup ari.

**U** : Sai ingot ma ale Jahowa angka denggan ni basaM dohot asi ni rohaM, ai sian na robi do angka i. Haleluya, martangiang ma hita : Ale Tuhan Debata Ama nami na dibanua ginjang. Holan ala asi ni rohaM do umbahen natarbahen hami marpungu di inganan on, lumobi ma hami pomparan Op. Ambe Pasaribu na adong di luat on dohot di luat parserahan; laos songon I do dohot dongannami na saporadatan. Diramoti Ho do hami sian nasailaon diganup inganan nami, alani hupuji hami ma Ho, laos huhamauliatehon hami do saluhut denggan ni basaM naung pinasahatMu tu hami. Diparbaga Ho do dibagasan hataM, manang didia adong dua manang tolu halak marpungu marhite goarMu sai lehononMu do napinangido ni nasida. Ale Tuhan nunga pungu hami nuaeng dison, sai pasaut bagabagaMi di ngolu nami jala na tau sangap di Ho, pasaut ma bagabagaM dipangidoan nami nahombar tu lomo ni rohaM. Angkup ni i lehon ma natau hangoluan dohot las ni roha di hami, jala saleleng dihasiangan on

hami tongtong pasaor tu hami pangantusion di hangoluan saleleng ni lelengna marhitehite Tuhan Jesus Kristus Tuhan nami. Amen

**4. Marende BE 443:1, "Dung Tuhan Jesus" BL. 393**

1. Dung Tuhan Jesus nampuna au  
Songgop dameNa, biarhu lao  
Taripar gogo ngoluNa i  
Nasa dosangku naung sae do i  
Tabaritahon holongNa i  
Didia Tuhan tudoshon i?  
Tuk manumpahi, tarlobi da

Sasada Jesus pinuji ma

**5. Tangiang Pangidoan Dohot Bagabaga ni Debata.**

- U** : Ale Tuhan Debata, Pargogo na so hatudosan. Parasiroha na sumurung. Ho do Debata na marbagabagahon: Molo adong dua manang tolu halak marpungu marhitehite GoarMu, lehononMu do na pinangido nasida. Ale Tuhan Debata na maporus do hami nuaeng tu adopanMu, sai pasaut ma bagabagaMi. Ondingi ma hami angka na marhaposan tu Ho. Ro do hami nuaeng tu adopanMu mangasahon asi ni rohaM. Sai unang tulak hami, sai jalo ma tangiangnami.
- R** : Ale Tuhan Debata, Pargogo na so hatudosan, asi ma rohaM di hami.
- U** : Ale Tuhan Debata, Pargogo na so hatudosan. Manatap do Ho sian habangsaM di parpunguannami on. Mansai las situtu rohanami siala dipatulus Ho do sangkapnami, boi tipa simin na pir di oppunami, Op. Ambe Pasaribu. Ale Tuhan, sai lehon ma di hami angka pomparan hahipason dohot ganjang ni umur. Laos lehon ma di hami hasadaon dohot roha holong
- R** : Ale Tuhan Debata, Pargogo na so hatudosan, asi ma rohaM di hami.

**U** : Ale Tuhan Debata, manatap do Ho di sitaonon na masa humaliangnami panghorhon ni Covid-19 na mambahen lam mabiar hami di parngoluonnami. Nunga tung marpangontak ale Tuhan sitaonon on nuaeng di tongatonga ni bangsonami nang di luat portibi on. Ale Tuhan, di adopanMi, marpangidoan hami nuaeng, somba jarijarinami dohot unduk simanjujungnami, sai asi ma rohaM, salpuhon ma sahit ala ni Covid-19 on sian hami saluhutna pomparan Op. Ambe Pasaribu dohot sian sandok portibi on. Tibu ma alusi anggukangguknami, asa tung hatop sumuang hami mangula ulaonnami.

**R** : Ale Tuhan Debata, Pargogo na so hatudosan, asi ma rohaM di hami.

**L** : Ale Tuhan Debata, Pargogo na so hatudosan. Tatap ma nang dohot pamarenta ni bangsonami, angka pangubati dohot sude angka na mangula arian dohot borngin laho manghobasi angka dongannami na hona sahit ala ni virus corona. Pargogo i ma nasida be, unang loas tahutan nasida. UlaulaM do nasida di tonga ni bangsonami asa tung saut sangkap hatuaonMu di portibi on. Paloas ma mardame sonang rohanami pamarenta dohot rakyatna, asa dos rohanami laho manggotap harararat ni virus corona di hasiangan on. Ala ni i, huudukhon hami ro tu toru ni tanganMu na gogo i. Sai sesa sude dosanami, dohot dosa ni dongannami. Ho saming do haporusannami, jala marhaposan tu Ho do hami. Sai lehon ma di hami hangoluan siganup ari, jala palua ma hami sian hagogotan na masa nuaeng, pasonang jala apuli ma hami angka na hinophop ni Tuhan Jesus Kristus, Tuhannami. Amen.

**6. Marende BE. 227:1-2, "Jesus Ngolu ni Tondingku" BL. 26**

1. Jesus ngolu ni tondingku, Ho do haporusanki  
Gok di Ho nama diringku, rodi nasa langkangki

2. Lam tangkas ma patuduhon, tu au on panghophopMi  
Asa i huhalungunhon, hot ma au di lambungMi

**7. Panjahaon: FILIPI 2:1-8**

**U** : Molo tung adong apoapo marhitehite Kristus, dohot sosososo holong ni roha dohot parsauran ni tondi, nang talup dohot asi ni roha,

**R** : gohi hamu ma halalas ni rohangkon: Sada ma parrohahon hamu; sada ma haholonganmuna; saroha, sapingkiran ma hamu!

**U** : Unang ma mardingkandingkan manang marhasangapon na rumar; alai sian toruk ni rohamuna be ma rajumi hamu donganmuna sumurung sian dirimuna!

**R** : Unang ma na ringkot di hamu be matahon hamu, dohot ma na di dongan!

**U** : Songon parrohaon ni Kristus Jesus ma parrohaonmuna!

**R** : Atik pe rupa ni Debata di Ibana, ndada songon na nidobo dirajumi rohana tudosna i tu Debata.

**U** : Dirumari do dirina jala disolukkon rupa ni hatoban, gabe suman tu jolma do Ibana jala rumang jolma dapot di Ibana.

**R** : Dipatutoru do dirina; na gabe pangoloi do Ibana paima mate, pola tung mate tarsilang!

**U** : Ido sahatna ... Martua ma na umbege hata ni Debata jala na umpeopsa.

**R** : Amen

**8. Marende BE 487:1-2, "Tung Halak na Margogo" BL. 329**

1. Tung halak na margogo sipartangiang i.

Dokdok pe sitaonon, ndang olo talu i.

Pos situtu rohana di Debatana i.

Tuhanna manaluhon sude pangaloi.

2. Nang hirahira mogap dibaen sitaonon i.

Marsinggang do Ibana managam Tuhan i.

Dung jumpang pe tingkina sumurut arsak i.

Tarapul ma rohana dibaen Tuhanna i.

**9. Tangiang Pangondianon**

**10. Marende BE. 30:1-2, "Jesus lehon hatorangan" BL. 135**

1. Jesus lehon hatorangan hapistaran mangantusi hataMi  
Lehon mata na marnida dohot roha na umboto dalamMi  
Asa tongtong maradophon bohiMi mardalan hami  
Asa digomgomi TondiMi ma hami
2. Ganup ari ma ajari hami na di haatoon i dope  
Asa lam porsea hami Ho saming do hangoluannami i  
Lam lumeleng lam pasolhot tu rohaM ma rohanami  
Hombar tu HataM ma pangalahonami

**11. Jamita: FILIPI 2:5-8**

**12. Marende BE. 91:1, "Hatuaon do" BL. 55**

1. Hatuaon do Las ni roha do Hangongot ni Tuhanta i  
Mago do hita Ngot ma Tuhanta  
las be, las be ma rohanta i  
Mago do hita Ngot ma Tuhanta las be,  
las be ma rohanta i

**13. Ayat Pelean: 5MUSA 12:11**

**14. Tangiang Pelean**

**15. Ende Pelan: BE. 470:5, BL. 317**

5. Sere, arta, hepeng pe, buat ma di Ho sude  
Tondi nang pamatangki, ingkon Ho oloan ni~i

**16. Tangiang Ale Amanami**

**17. Pasupasu**

**18. Amen-Amen-Amen**